


TA, ETKE, *im* EWI WĀWEEN

JUON KŌMEĻEĻE EO ILO DIPDIKIN AN JEPĻAAKTOK EO



Jān Faith Sutherlin Blackhurst

Māākjiin ko an Kabuñ in

Baj ba kwoj pād ilo juon tūreep juon wiik aitokan ñan tarkijet ippān baamle eo an eo mōttam. Ekanooj lap am limo, bōtaab kwoj jino in būromōj kōn baamle eo am make. Innām jemam ej jeje waj ñan eok ñan lale ejiet men otemjej—ej ta eo kwar aikuj ñan eñjake iakwe im keememej.

Mour ioon laļ in ekadu. Anij ejjab jeje ñan kōj, bōtaab jej ettoļok jān kapijuk-nen eo ad ilañ, kōn menin juon wāween Jemedwōj Ilañ ej kwaļok An iakwe ñan kōj ej kōn jilkintok rikanaan ro.

TŌRE IN IEN BŌK EDDO

Rikanaan ro rej tōl ta eo ñae etan tōre in ien bōk eddo ko, *tōre in ien bōk eddo ko*, tōre ko an ien ñe (1) Anij ewōr juon an ritōl an priesthood kar kōmālimi ioon laļ in (2) ritōl in, juon rikanaan, ej katak kōn karōk in lōmqor eo kajju jān Anij. Innām rikanaan eo ej katakin, ak *leļok*, gospel eo ñan armej ro.

Kōnke kōn jeje ko rekwojarjar, jeje-ļā kōn elōñ tōre in ien bōk eddo ko. Jet iaan ko raorōk raar ko an Adam, Inōk, Noa, Ebream, Moses, Jisōs Kraist, im Josep Smith. Irooj eaar jino juon tōre in ien bōk eddo kōn kajjojo rikanaan rein.



PIA KO JĀN BEN SIMONSEN

Ñan katakin gospel eo, kwonaaj maroñ in kōmeļeļeik ta in buñ jān tōmak, ien bōk eddo ko, im JepĻaaktok eo rej. Jaat in emaroñ jipañ.




BUÑ JĀN TŌMAK

Buñ Jān Tōmak eo=nana. Ñe juon armej ak kumi ej oktaļok jān mool ko an gospel eo an Jisōs Kraist, kowaan rikanaan ro, im jino jerawiwi, rej pād ilo buñ jān tōmak.

JEPĻAAKTOK EO

Juon jepĻaaktok ej juon jermal in bar kōrōļtok juon men ñan jekjek eo an jinoin tata. Ejjab juon bar ejaake, eo ej ukōt juon men epād kadede ñan ejaake juon men ekāāl. Ñan waanjoñak, eļañne kwar kōñaan kōjepĻaaktok juon em emor, kwonaaj kar bar kalōke kōn ejja ļamļam eo wōt an me kar jino in tata. Komaroñ kōñaan kobaik juon jikin kōmāneļ ekāāl, bōtaab kwonaaj kar ukōt mweo, ejjab kōjepĻaaktok.



Gospel eo an Jisōs Kraist kar aikuj in kōjepĻaaktok kōnke eaar jako ilo iien Buñ Jān Tōmak eo Eļap. Armej ro raar mour iumwin epepen ko ilo an ejjeļok Kabuñ e emool. Kōn menin Irooj eaar *kōjepĻaaktok* Kabuñ eo An im gospel eo kōn Josep Smith, ejja ainwōt an kar rikanaan ro etto kar kanaan. (lale Aiseia 2:1–3; 29:13–14; Jerbal 3:19–21; Revelesōn 14:6–7; 2 Nipai 3:3–15).

Gospel eo emool an Jisōs Kraist ej pād ñan an pād wōt—kōn menin kwonaaj ke pād wōt ie? Emool meñe laļ in ej ļapļok im ļapļok wōt an nana, Kabuñ eo an Jisōs Kraist enaaj pād wōt ñan jemļokin.

Ewōr juon am kålet ñan kōmmane—ejja kålet eo wōt me aolep armej raar aikuj kōmmane jān jino in iien: kwonaaj ke ļoor rikanaan eo? Eļañne kwoj, kwonaaj jeraamman im bōk Jetōb eo ñan tōl eok.